



Ашкуда няврэмат кеша луңхансяп сыйемийс



Хор: Альбина Тырлина

Там лапатаң Ас нопатты тыдась хольмаң педа хутмет хатадан округев хуват кашц вошан па куртан, ихосьяңмет па яртъяңмет класс етшам няврэмат ураңан, ёхи хасям луңхансяп сый щацас.

Тампуш Ямал муван ихосьяңмет классан хулам сёрас молтас няврэм уталтыты етшас, яртъяңмет классан – лапат сёрас молтас.

Пулңават вошан нядсот молтас ихосьяңмет классан уталтыты

эви па пох «Ледовой дворец» хотан акатсайт. Яртъяңмет класс няврэмат кеша ашкудаятан луңхансяп сый сыйемийс. Щи хатл эвет па похат хорамаңа луматдыман, вальс як яксат, уталтыйм хоятлада хошам яснат ястасат, лыплат мойдасат па хорам хорат версат.

Округеван яма уталтыты няврэмат ураңан мойлапсайт дэсятсайт. Ихосьяңмет класс етшам хольмаң педа хулам няврэм Хон Петра воша «Алые

паруса» емаң хатла яңхал. Хуламхосьяң эви па пох – Москва воша Кремлёвской емаң хатла тутлдыҕайт. Си тумпийн, мет ошаң ёх, хой ЕГЭ яма мадат па лувилал уталтаты хоятлад округ губернатор грант охан – сот сёрас солкувайн мойлаптадайт.

Муң па кашц ашкуда етшам ханты эвета па похата мойлапса ясаң китлув. Ин нынана елды манти юшан пирыты мосал. Хой 10-11-мет класса, хой па

па вошата уталтыты манал, хой па мосаң рупитты питад. Хоты си юш хуват шушлаты, ситы си лув манал.

Юшн кен ат ул, веськат хоятат туп ат уйтантыдат. Ашкудайн муя уталтасайты, муй ям ус, иса нумадан. Муй номас понтсаты, иса ат тыйл. Си хатл, ашкудайн, яха уталтыты духасдан, уталтыты хоятдан, нын самданан ат хасьдат.

Альбина Тырлина ханшам потар

Мет хорамаң сак лопсат

Овкурт элты улты тус ёшаң нэ верам хорамаң Хон мувев ловатан Москва вошан эталтыты питдайт.



Хор: vk.com/trvmujitrv

Елена Куртямова туса ёнтасты па верантты нэ. Лув ханты сохат па хорамаң верал. Олңа ийикел, няврэмдал па лув кешайл ёнтасас. Щалта па хоятат тын сахат вохты питсат ялап ернасат ёнтты. Щиты самаңа тайты вер айлта рупатая йис.

Тампуш ёнтасты па верантты «Русский стиль» нэмпи касапсайн няд номинация понман ул: няврэмат луматты сох, ун хоятат луматты сох,

думатты сох пидан тайты пормасат па арсыр хорамаң. Елена Эдуардовна каматса картама сак лопсад щи касапсайн альсалды. Арсыр хорамаң рупатайдал «Украшения» нэмпи номинацияя пирысайт.

Аратал, Россия мувев элты, 136 хоят заявка китылыйс. Щилта 48 хоят туп елды питас. Елена Куртямова картама хорамаң пидан ищи тохи лоңас.

Национальной центр «Россия» хоца ун вантапса хар лэцатман ул, хота ар няврэм тайты хоттэл хоятат кеша «Многодетная Россия» нэмпи форум пуншда. Щита, уц тылац 18-мет хатадан ханты нэцев картама сак лопаслад эталтыты питад. Хоттэл хоятлад ищи лув пилэдан яңхлат.

Иван Сандрин ханшам потар

Ун юша елды уталтыты мандат

Хащам лапатам Васъёханов куртаң ашкуда-интернатан, уншак няврэмат уталтыты вер етшаптаты кеша, емаң хатл дэщатса. Вулэң па вой-хул велпаслаты ёх няврэмдал яртъ-яң-ихощъяң тал сус удам хотэл элты ел мандат.

Љорвош районан хулам ашкуда-интернат ул: Овкуртан, Васъёханован па Горка вошан. Щита ар пелак вулэң па вой-хул велпасты хоттэдат элты няврэмат улдат. Хой няврэмат па ай куртыет элты ёхатсат. Љув уталтыты сус иса ияха ун хоттэл иты улдат.

Питлор, Љорвош, Унтсылкурт, Ёханов, Ёханкурт па Мужа



Хор: Ирина Косгина

Васъёханов ашкуда-интернат етшаптам няврэмат (венш пелак элты вантаты): Максим Ребась, Ангелина Озелова, Дмитрий Озелов па Филипп Максаров.

вош элты улты няврэмат, хой антидал-ащидал вутан яңхлат, Васъёханован улдат па уталтыдат. Тампуш щидта нял няврэм ел пурлаплат. Хулам няврэм 9-мет класс па йи похие – 11-мет класс етшаптасат.

Максим Ребась, Дмитрий па Ангелина Озеловчан Пулцавта Ямальской многопрофильной колледжа елды уталтыты номас понтсат. Мет уншак похие Филипп Максаров, ун леккара уталтыты лытал.

Хоты энамты няврэмат номас понтсат – щиты ат питад, ат елды тумтака уталтыдат па улдат!

Иван Сандрин ханшам потар

Ашкуда няврэмат рупитты этлат

Ущ тылащ олаңмет хатлатан, нялхощъяң тал доват элты нийлхус тал унты, ашкудайн уталтыты няврэмат луң сус рупатая этты верытлат. Няврэмат кеша катсот педа нялъяң тахайн рупитты харат дэщатсайт. Щидта, хольмаң педа нял рупитты лот ялап щир хуват рупатаел туты питад.

Там луңан «Ямолод» ашкудайн уталтыым катсот молтаскем няврэм, олаң пуш рупитты харата этлат. «Ямолод. Труд» проект хуват, энамты ёх, муй рупата педа уталтысат, щимащ рупатайн

мадайт. Уталтыым вердал, рупатайн эталталдал. Тамиты уталтыман, няврэмат ай тэдан уйтты питлат, уна ювам юпийн, муй рупата педа елды манты уталтыты.

Округев хуват доваталан, вет щёрас молтаскем эви-пох рупитты питад. Аршак хоят ох шитты ураңан, няврэмат кат лапат туп рупитлат. Етшатэл юпийн, рупитам охан сохаптадайт.

«Тунаят, сусан, ведщи нялхощъяң тала йисам па рупатая ант вусайм. Ма пилэман уталтыты духаслам арсыр тахаятан рупитсат. Вошхулэт

хуват нампар акатсат, юхат, лыплат омассат, пушасат оля-



Хор: vk.com/popovlegshur

пан нёсытсат, ай няврэмат эталтасат, луңатты нэпекат маты хотан рупитсат.

Хойтат па молты рупитты хотатан мосты нэпекат дэщатсат, арсыр рупата версат. Тампуш ма шеңк такан лавласлам, хун рупатая этлам. Щаха маты охламан ялап потарты хошап дутты утцидам. Кушкепа аңкем-ащем элты ох ант мосад вохты», – Артём Серасхов ястас.

Зоя Куртямова ханшам потар

Ун вошаң ханты сый

Ас нопатты тылащ хольмаң педа нялмет хатадан Пулцават вош ОЦНК каш верты хотан ханты ёх артан актацисат. Вошан улты ханты хоятлув рут ясцев ант ёрэматы ураңна, кум шитман, ивеван ияха уйтантыдат.

Хой дытал ханты ясаңна арыты, якты па нараслаты Окружной центр национальных культур хоца яңхты верытал. Няврэмат па ун хоятат кеша талаң хулам коллектив ул.

Мет ай няврэмат «Мурхи сун» нэмпи ханты фольклор-

ной группа пидан Наталья Фёдоровна Ребась рупитал. Лапатам каматса пуш ияха уйтантыдат. Ханты арат па луңтарат уталталат.

Еша уншак эвиет, похат па «Сорни тутые» нэмпи ханты группа хоца нарасъюхан па

тор сападан нарасладат. Щита няврэмат пидан руц ики, Валерий Григорьевич Прыжанков рупитал. Ханты арат па ёнтапсайт педа лув шеңк самаң. Щишан, ханты мир педа лув ун онтас тул.

Ун хоятат па «Овас мувие» ханты фольклорной коллектив хоца яңхлат. Татьяна Ивановна Енова вошаң ханты хоятат, кум шитман, ияха акатал. Љув уйтантыдат па ханты арат арылат.

Каш верты ханты хоятлув, муй тал шуп сус уталтысат па муй версат – эталтасат. Щи ураңна концерт дэщатсат. Аратал лув хус молтас номер альсат. Арсыр рут вошаң хоятат умащ ханты ясаң хулантыты па вантты ёхтыдысат.

Иван Сандрин ханшам потар



Хор: Иван Сандрин

Кат шимлаң мир ёх хоятқан

Там тал Хон мув мир ёх ияха пилташты Тада постаман ул. Улты мувеван, кашң мув суңан ар мир хоятат яха, лухсаңа улдат. Хоттэдат тыйлат, няврэмат сэма пилдат. Муң округеван па ар мир ёх ул. Там лопасан симась айлат ёх – Дмитрий па Сержи Кельчинңан хоттэл элты потрэм тулэм.

Шоши мир ёх улапсайңан

Дима ханты пох, ийимел па тоджинкая луңтасал. Хоты шоши мир ёх элты йи хоттэл тыйс, хоты шимлаң мир улапсайңан елды тулайңан – сит элты ханты похев ситы ястас: «Ма Пулңават вошан энамсам, кимет ашкудайн уталтысам. Кашң тал-луң Лорвош курта рутдам хося яңхилдысам. Си порайн хул-вой велты ёх элты потрат ханшты питсам. Газетайн рупитсам. Округ губернатор па И.Г. Истомин литературной премияйңан лауреата улдам. Ин Алтайской государственной университетан заочной сирн уталтыдам.

Ийимем – Сержи Ак, Тыва Республика Красноярской мув элты. Си рут мир ёх Кеван улдат. 2020-мет тал элты шимлаң мир хоята луңтаслат. Лув муң хоятлүв иты вулэт тайдат, туп антом шеңк ар. Вудыдал унат, Вурты нэпека доңалман улдат. Сита улты ёх вулды шаншан яңхлат. Вудыдал мисыйиңк мадат. Сит элты дэтот верлат. Хул-вой ведпасладат. Хоплад хуват, яң молтас хоят омасты верытал. Вонсямот акагты па нохар сэңкты каматса лапта яңхлат. Верам сопаслад лэсытам тахаята мадат. Ситэдан ох шитлат. Кат тал йи пуш вулды ёх емаң хатл верда. Няврэмат па ун хоятат вулды шаншан навралтыман каслат».

«Российский Север» форуман уйтанысқан

Ханты похев ийимел пилан «Российский Север» энамты ёх форуман, Красноярск вошан, уйтанысқан. Хоты си елпийн улапсайн манас, потар тус: «Си порайн ма ёрая рупитсам. Сялта Москва воша мантсам, Московской нэпек луңатты хотан рупитсам.



Хор: Дмитрий Кельчин

Ийимем ашкуда етшамал юпийн, Москва вош Президентской академия (РАНХиГС) етшаптас. Кат тал Южной Америкайн рупитас, испанской няврэмат английской ясца уталтас. Сита улман, си ясңал па уталтасды. Хун рутладан вохса, мохты ёхды ёхтас. Рут мувалдан

шоши мир ёх няврэмат па энамты ёх пилан рупитас. Си юпийн па Москва воша манас, Российской наука академийн (РАН) уталтыйс.

Одңа мин Москва вошан усман. Поры вермеман юпийн, Хон Петра воша улты мантсаман. Похев сита сэма питас. Ханшты верэм си вошан елды тусэм. «Шепан нормат» («Мосты шамана») олаң нэпекем этас. Пилэман эсалты нётсайм.

Ин Пулңават вошн улдалман. Хун пил хоятэм ты улты вохсэм, мохты кашасяс. Си елпийн лув, ты, Овс мув мир ёх съезда ёхтыдыйс. Улты мувев шеңк самада хойс.

Мин кат няврэм тайламан: йи пох, йи эви. Похева вет тал, эвемана – йи тал. Похев шеңк хорат ханшты самаң. Эвев па, хун уншака йил, арыты ханты группая малэман. Ийимем

ханты улапсаев шеңк самаңа тайдалды. Ханты ернас па сак лопсат тайты дьтла».

Йи вер верлаңан па тулңан

Дима па Сержи шимлаң мир ёх хося луңтаслаңан. Рут ясаңдал, рут мувев педа талдайңан. Сит элты па потар тус: «Мин самламан рут хоятламан педа хошилңан. Сисан мин сирэман рут хоятлува молты нётоса верты дьтлайман.

Ма рут мувеван улман, рут ясңем туп хулдэм, велси уталтыты питсэм. Ханты хоятлүв улапса, сирлүв-пищлүв элты аршак лэрапдам, ханшдам.

Ийимем па. Сикуш ин Овс муван ул, рут мувалдан улты хоятлада исипа нётал. Тата улман, ныйл пилан, рут мувалдан 155-мет гектаран энамма юхат, ант сэварты ураңан шависқан. Унт дутты аукционан Китай мув компания нох питас, 49-тада сита энамты унтат лув ёшеда питсат. Сержи унт законат па кодексат яма вантман па уталтыман, ёвра манам верат уйтас. Мосты тахаята нэпекат ханшсаңан. Ситы рут мувев, унтэл, войдал шависқан. Симась вер ус.

Пил хоятэм округ вошаң па куртаң шоши мир энамты ёх пилан рупатайл тул. Яха рут ясңед елды тувман, ялап проектат дэсытлат».

Хун шимлаң мир энамты хоттэдат кутан симась хоятат улдат, ияха ясаңдал, улапсайлаң шавилат па елды тулат, няврэмлаң си педа уталдалат. Си порайн няврэмлаң па ситы елды улты па верты питлат.

Альбина Тырлина
ханшам потар



Хор: Альбина Тырлина

Ай щуциет ел щи пурдаплат

Там ванан, хут-лапат тада ювам ай няврэмием хатл сус яңхам хотдал элты ким пурдаплат. Щи хатлат кеша, шоши муеван, кашц куртан па вошан емац хатлат мантсат.

Аңкидалан-аңкидалан олаң пуш хатл сус яңхты хота тутыйн, няврэмием щах айт. Ведщи шушидыты утдам пошхиет, кутдалан дув моштаты яседелан лолыдат. Тухлат, ёшан нялы каталты холна ант хошлат. Ким этты порайн ал думаттадайт.

Вет-хут тал сора хащал. Хой ин ястал, ай щуциет элты муй доват эвиет-похиет энампсат. Еша кеша тухал пеңкдал антомат. Потарты, няхты сиед. Хухатдылат, навратдылат. Холлапа ювантыдат па яма йилат.

Ин тамац, тохдаңа ювам няврэмийилув тамхатл арат арылат, яклат, луңтарат луңатлат. Дув пилэдан рупитам няврэмат шавиты нәңлада, дэтот кавартам, яма потарты ураңан нядам па сый



Хор: Наталья Тырлина

туңматты, касты, арыты па якты уталтаты хоятлада, аңкидала-аңкидала мойлапса яснат потарлат. Хатл сус удам хошам ай хотыедал

хайты па щаль. Тата дый энампсат, юраңа йисат. Нумасман потарты па луңатты уталтасайт. Духас версат. Тата энмам пора элты, сам

хувлаты хошам номпсат иса тайты питлат.

«Ма ун аңкеман хорамаң ернасан, ялап тувелькайн, нови ун бантикан дутсайм. Емац хатл порайн шеңк алаң нох верласам. Хорам сохдам думатсам па емац хатла мантсус. Ма буквайт уятдам па яма луңатты хошдам. Ашкудая шеңк манты лаңхалайм», – Виктория Тырлина потартас.

«Емац хатл порайн, муң холыена, щикем хорамаңа думатдыман усув. Муң пилэван рупитам хоятлува мойлапсайт лэщатсус. Хун арыты па якты етшасув, муң па мойлапсаятан масаюв. Ёша мийм даращит щикем давартат усат, туп ма ищи па мойлапсаем такан каталсэм. Щикем лаңхасайм, сора ёхи ёхатты па вантты, муй дыпийн одал», – Эмилия Тырлина щиты ястас.

Луң сус сора етшал, сусан там эвиелув-похиелув ялап юш хуват шушмадат. Тэлые ялап няврэм ашкуда пасан сура омасал. Щиты щидупсаев елды манал.

Мосты вер туты нэ

Ас нопатты тыдащ хольмац педа хутмет хатадан ёрая рупитты па тынасты ёх емац хатлэд постасэл. Там йисан, щимац рупата хар пуншты па елды туты ураңан арсыр нётапсайт удлат. Рупата пунштыгыйн, уталтаты па нёпекат щира лэщатты хоятат па удлат. Туп пирыйм вер мосмаңа тайты мосал.

Щимац хоятат кутан Оксана Бурхоновна Хасанова. Дув шоши муеван охшамат, щашканат, нуйт па ёнтасты хорамат тыныйл. Емац хатлат верты харатан иса тынасты этдыйл. Хоят педа шеңк самаң па потраң нэние.

Тащ хотатан, худ велпаслаты панатан па ай куртатан улты нэңата тамац тахайн дутасты мет ям. Шеңк ун онтас тул. Лапкайт каншман вош хуват шушидыты ант мосал.

«Ма ай тэдан там муван энампсам. Овкурт ашкудайн яң класс етшаптасам. Ащем узбек, щит ураңан опрац нэнем щимац. Аңкем ханты, щитэман

ханты ясеңев, ханты улапсаев яма уятлэм.

Уталтымем юпийн, Пулңават вошан улты хащсам. Тата ху сая мантсам. Кат эви тайламан. Елпи «Станция юных туристов» ашкудайн уталтыты няврэмат пилан рупитсам. Юхат «Крылышки» ай няврэмат хатл сус яңхты хота рупитты мантсам. Щита эвиет-похиет дохан яңхты, касты па зарядка верты уталталдам.

Щи рупатаем тумпийн тынасты верэм тулэм. Там рупатаеман ийикеман шеңк нётдайм. Щашкан па нуй сыхат ванты, шеңк давартат, алты порайн юр мосал. Рупатаем самаңа тайлэм. Муй щашкан холта ёнтда, щит па уйтдам. Щит ураңан мохты мосты пормас вудам.

Емац хатлатан хоятат яма дутаслат. Пулңават вошан лапка па тайдам. Лапкаем «Мария» аңкем нэман нэматсэм. Морт кеша хоятат тохи па лоңтылат.

Ёра вер туты, шеңк даварт рупата. Тухал хатлатан турмал ицки, тадаң хатл каман лой-

ман. Ерт порайн па пормасат мордайт, щит па соралтты мослат. Там йис ар нёпек пилан ищи щёхлэмада. Щи вер па уйтман тайты мосал. Пормаслам дутлайт, щиты ки хоятата щит мосал. Анта ма ки, матты па хоят тамац рупата лудан тус», – Оксана Бурхоновна ястас.

Муң па Оксана Бурхоновна педа па ёрая вер туты хоятата мойлапса ясаң китлув. Кашц пормас дув хоятата ат ликмал. Тынлан, дутасты хоятата па нынана, морт кеша ат удлат. Нын туты рупатайн мосмаң па кен ат ул.



Хор: Зоя Куртямова

Хаттэл эвалт олдув

Муувна камн хорпи номсат олдат. Щитна Ас напатты тыдасьна 21-мет хатлна Охсар поход аскодайна лапатмет классна онтыты няврэмат пидна ям касты вер версув. Щи вер нэмал – «Хаттэл эвалт олдув».

ЩИ вер еса па хорписак ос. Аднась няврэмат хоца тамась потар луңатсам. «И порайна кадаң нэңхы ях няврем вул ащел эвалт инцассалды: «Малайи муң касң тал и таха эвалт иёлты каслув?» Вул ащел ясна катра антпал вусды па лавал: «Катра йис тэлна щи касты ёслув эвалт муң ротлув манылдысат. Щита, ёсат хыщсат, муң хаттэлдув хув олта питлат».

Няврэмат ямас холанмел юпина, номасна щи потар вусэл. Номсэл кадаң нэңхэт хатна манас. Там олты нэңхэт иёлты номаслад хаттэл, алаң ясаң, алаң курам, алаң кадаң охал, алаң хасэңк эвалт ол. Няврэмат лув хаттэл одам вер номасна вусэл. Хоты ацидал па амыдал ям ясаң лавилдысат, хоты емаң мувел щалитман тайта масл, хоты ямас па тумтакан олта масл.

Няврэмат щиты ямас ропитсат, ям номсат, потар едась ям ар иты сара щиты манас. Щи лавам потардал нэпекна понсалдал, хор версат.

Хаттэл – щи йи ясаң хунты. Щит ияха манты ёс. Щи ёс туңа ат манл па ай ат таял!

Ольга Пандо хансам потар



Хор: Ольга Пандо

Ялап луңтап мира эталтаса

Ас нопатты тылащ хольмаң пела ветмет хатадан Пулдават вошан улты Национальной библиотекайн, «Сказки дедушки Ивана» нэмпи луңтап мира эталтаса. Щи нэпек руц па ханты ясаңтан ханшман улда.

Щита «Ёрхо» па «Волшебная бандура» нэмпи монщан лоңалман улдаңан. Луңатты умащ ураңан хорат Дарья Вануйто, Зоя Худи па Максим Чаглей ханшсат. Монщат ханты ясаң Геннадий Кельчинна кератсайт. Хоты там рупатайл Геннадий Павлович версалды, каматса ясаң ястас: «Кат монщан мийдысайм, ханты ясаң толмащты ураңан. Шеңк па мув мир хоятат монца суктаман улдат. Ванты муң, хулам охпи кулят ант тайлув. Муң хоцаев Ялань ул. Щишан там этам нэпекан ма щиты айдсэм. Хулам охпи Ялань. Катра па ин руц мир хоца, ох – щит куца. Кат ох – кат вуш уншак куца, хулам ох – хулам вуш уншак куца. Мосал моштаты, хун аршак ох – мет волаң куца.

Олаң монщ – «Ёрхо», ханты щиран па питал – Юр ху. Пох лэңки иса увал-увал. Ун яядан ким лукемада, кимет яядан па ёхлы вула. Щи ястал: «Ма муя холдасам? Ванты ляль муң хоцаев йил». Кимет монщ – «Волшебная бандура». Муң щимащ шуп ант тайлув па, щишан нарасьюха версэм.

Хун ханты монщат руц щира пондайт, щита номас талаң тэдан ант дарпитла. Куш «лов» вуя, хоты «Мукарэң ловие». Щита век па номас понман улда. Дов – щита номас понман ус тутаң хоп. Там йиса ки керэматы, ищимет «Орешник». Муң йис арат, лоңалтопат тайлув, хота ханты мир катра улапса альман улда. Щишан лувилал туп ясаң па ош тайты хоятэван туңа-щира руц ясаң кератты верытлайт. Вольняя толмащман – рахал няха питты.

Ма нумастэман, там толмащам нэпеклам, пора хайман туңа-щира оша пондайт,



Геннадий Павлович няврэмата алял, муй хорпи монщат щита улдат.



Хор: Аллина Тоярова

Ойң хоят верытас луңтап ёша паятты. Па хоятат там нэпек библиотекайн мощатты верытлэд.

моштадайт. Няврэмдуван щи веран ясең шавила па елды тула».

Аратадан йи щёрас луңтап этас. Номас понман улда ашкулдаята, ай няврэмат шавиты хотата па библиотекаята округ ловатан китты. Щи веран, лаңхаты няврэмат, ищипа ханты ясаңан луңтылдылдал, оша понылдылдал.

Аллина Тоярова ханшам потар

Сорашак айкел мощатты ураңан

«Лух Авт» газета кашң лапат йи пуш этдыйл. Тухал ишан, ёхаттал унты талаң лапат хащал. Щи веран, сорашак айкелат мощатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоца мощаттыты.

ЩИ ураңан там QR-код мохты лоңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыед-тохел поныдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясең шавилэв!



ОБЪЯВЛЕНИЕ

Там QR-код хуват лоңаты па вантаты, муйсыр нётосайт СВО хоца улты мохета мадайт. Щи тумпийн нэңдала, няврэмдала, аңкидала па ацидала ищи нётоса вуты рахал.



СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Приблизительно из других регионов возмещаются затраты на проезд от места проживания до г. Салехарда. В период оформления проживания в г. Салехарде и 3-разовое питание предоставляется бесплатно.

ОБУЧЕНИЕ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ ПОДГОТОВКА
- ✓ МЕДИЦИНСКАЯ ПОДГОТОВКА

3 600 000 Р
400 000 Р
до 120 000 Р

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО **ОТ 225 Т.Р**

Амаматщет

Рут ясцев павиты па елды туты ураңан, мир доватан арсыр верат верлайт. Ямал мувеван, няврэмата кат ясаңан ханшам, хорам ольпаң хоратан понам, луңатты нэпекат этлат.

Ёмвош округан щи вер пела нэман ох эсалда. Кашң тыдащ ханты па охаль ясаңан журналңан этдылңан. Щуциет рут ясаңан потарты уталтаты па ведщии ашкудая манам няврэмата луңатты ураңан, ай книжкайт ханшлайт.

Амаматщет, тус ясаң потар шупиет, ёнтты арыет щи нэпеката понман улдат. Луңатты нэпекдал, доваталан ищии аиет. Щимащ нэпек ай няврэмата каш па умащ ёшан каталты.

Там лопса Зоя Абрамовна Новьюхова ханшам нэпек элды амаматщет пондув. Лув ар тал Тэк курт ашкудайн рупитас. Тата лув там йис улты рупатаятан рупитты хоятат элды амаматщет ханшас. Нын па луңтадан па моштадан, хой элды потар манал.



Там нэңие киника мал,
Библиотекайн рупитал,
Арсыр верат лув уятал,
Наң туп лувел инщасы.

(ен яльвм вжиниу)



Там па муйсыр ям хатнэху,
Кашң хатл щии рупитал,
Паварт волтал, кирпащ понал,
Ишни верал, ов донщантал?

(лвох яльвмо лох)

Яста, хой па унтан ведал
Питы нэхас, вурты охсар,
Государствая хоң малды,
Планал иса тэкапталды.

(Вой вергы ху)



Ай няврэмат пидан рупитал,
Ёнтты, потарты уталтал,
Камн ёнтты – думатталды,
Лапатталды, ил олталды.

(Ай няврэмат пидан рупитал)



Хойн сора яста наң,
Кашиттэван, нох вудаюв,
Хулдытэван, ямалдаюв.
Куш ван ясаң нэм лув тайл,
Мира мосал щии ханнэху.

(Леккар)



Там ёх худ велпасладат,
Лашкуп хопа худдал малат,
Атаң-хатл ходал вантлат,
Худат щита ант ат шаклат.

(Хул велгы ёх)



Кашң хатл няврэмат уталтал,
Яма луңатты па яма ханшты,
Яма вер верты, туңа улты.
Ин наң сора яста-са,
Хой ул кимет аңкия?

(ен яльвты л)

Лув элтэда нянь муң лутлув,
Арсыр дэтот, думатты сох,
Муй мосмитал, ох муң вулув
Па дапкайн лутаслув.

(л яльв)



Там хоятэм вой ямалтал,
Прививкайн вой-худ донщал.
Укол верал, вой ур вул:
Вой па худ тумтака ат ул.

(Вой леккар)



Там имиём алаң кидал,
Ар рупата тайл лув:
Нящам хирал, мисдал пусал,
Ай мис йинщдал, торан понал.
Нумастанан хой щии нэ?

(он кар вой лив дех н)

Там икие тут вантыйл,
Хотат хоща шушидыйл,
Хота атом, катра тут кел,
Йира вулды, ялап кел
тадал.

(лх яльвня лл)

Зоя Куртямова лэщатсалды

Ими Хилды па Меңкат

(Олаң шупал № 21 лунталдн)

– Я-а, похие, муя манлан? Ёдан ула! Опрацен, ацен ищи куш яңхсатан, ин хота улдат?

– Имел ими ястас. – Опрацем – щит опрацем. Ма па ма. Ёх хоятаң шуң каншты манлам, нэ хоятаң шуң каншты манлам. Хоятат холща ад па улдат.

Хопала лэлас, Ас хуват щи манас. Лув муй ван манас, муй хув манас. Имомтыйн йи поталы щи ныты питса. Вана ёхтас, вантал: Меңк ики холпиял, ун сорт велмал.

– Акем ики, вуца!

Ин от ант па нэхлдыйс. Кимет пуш па ястад:

– Акем ики, вуца!

Худмет пуш лув лупан охал элты рэскасды. Ин от велщи нох ракнас, сэмдал пуншсалды.

– Я-а, Ими хилдые, наң нэш ултэн. Щи ловат, щи палат хуя ювмен. Ма тата наман омаслам, нэмолты ант моцатдам. Там, ад па, наң ойенан – йи сорт туп велсам. Там сортэн вуты туви, ма хотэма. Йи пелкал няр худа лэви. Кимет пелкал пута ат кавартла. Лэва па велщи мана.

Меңк имел хоца вуты манты питас, сортад илта таласал. Вуты ёхтас. Вутан ун хот омасал. Ёхи лоңас. Меңк ими омасал.

– Вуца, Меңк акем ими, там акем ики йи сорт велас. Йи пелкал няр худа лэты партсалды. Кимет пелкал пута кавартты партсалды. Ма лапатты партсайм.

Меңк имел нох дойс, вуты шушмас. Донщ сэңкты нарэп алэмас, ин от сэңкты щи питса. Сэңкса, сэңкса, ким пухалмаса.

– Мана, щи лапатсэм.

Ким питас, сэм йиңкдал муңхман ед шушмас.

– Хоты, лапатсайн? – Меңк икийн инщасла.

– Лапатсайм, лапатсайм.

– Лапатсайн ки, ям щи.

Елды манты тахайл пела щи довалмас. Хув манас, ван манас. Едан молты щи ныда. Ванамас: кат охпи Меңк ики няшилдыман омасал.

– Вуца ула!

Ин от ант па нэхлдал. Худметты луп тайн нэхтасды. Ин от сэмдал нох пуншсалды:

– Хилдые, наң нэш ултэн! Ад па наң ойенан паннэ щи велсам. Вуты туви! Мохдал няр тэдан лэви, худал пута ат верла!

Паннэл алэмас, вуты шушмас.



Хор: Любовь Возелова

Хота ёхтас. Вантал: Меңк ими няврэмдал пилан омасал.

– Там акем ики паннэ велмал. Вуты туты партсалды. «Ат лапатлайн», – ястал.

Меңк ими хот шуца яңхас, лонщ сэңкты юхшуп вус. Па щи сэңкла – шаншал карэмила, хонал карэмила. Сэңкса-сэңкса, воцкаса. Нох дойс, парта пелак сэм йиңкдал ям пелка муңхлалды, ям пелак сэм йиңкдал парта пелка муңхлалды. Нык шушмас. Нык ёхтас, инщасла: – Хоты, лапатсайн?

– Ант хун лапатсайм. Мохлэм няр нэхия лэсэм, худэн пута верса.

– Я-а, ям щи, лапатсайн ки. Щиталан хопал нык луке-

масды, Овс олаң пела щиты щи манас. Щи манас, манас, имолтыйн едан молты щи ныда. Вана ёхтас, хулам охпи Меңк ики сойпиман омасал. Ищиты хулам охпи Меңк ики лупан нэхтасды, лув сэмдал нох пуншсалды.

– Хилдые, наң нэш ултэн. Муй ловата, муй палата ювмен! Энамты ху энамал. Ад па наң ойенан и вунш моцатсам.

Вунш лувел маса.

– Вуты туви. Мохдал няра лэви, худал нык ат кавартла. Ат лапатлайн. Сам лэңкен вохла. Щи хуват таха элты йисан.

Вуншал алэмасды, вуты па щи манас. Ун паварт хотшики этас. Ёхи лоңас, Меңк ими няврэмдал пилан омасал:



Хор: Любовь Возелова

– Акеман няр худ лэты партсайм.

Меңк ими нох дойс, хот шуң патэла вуты манас. Ант потарман, нык доймтас, вунш худал алэмасды. Ими Хилды сэңкты па щи каталса. Сэңкса-сэңкса, ким пухалмаса. Сэм йиңкдал муңхман, ныкды щи шушал. Нык ёхтас, инщасла:

– Я-а, хоты, хилдые, лапатсайн?

– Лапатсайм, лапатсайм!

Щиталан лэдамтас, Ас хуват нохды щи манас. Лув муй хув манас, лув муй ван манас. Курт хорпи курт этас, вош хорпи вош этас. Йи хот пуңда ёхтас. Сорни хот, ун хот. Овал антом, ишнел антом. Ов кунш олаңан хойсалды, ов пелки ракнас. Хот дыпийн нови охпи пиращ ики омасал:

– Хилдые, наң холща этмасан.

Ёшен ёша анта йил, курэн кура анта йил, муя яңхлан? Ям опрацен и тамиты яңхас, хота ул?

– Ма хоты мув вантман, Турам вантман яңхлдам.

Акел икийн сорни лантаң пасана омасса, камн щир лэгот: щита саккарат, щита вунайт. Лэвман-йинщман омаслаңан. Молты сый щи сыйдмас. Хилдыел ястал:

– Ма сары, ким этдыдам, муй щита тыйс?

– Похие? Муя ким этлан?

Кат ху ким этсаңан. Шитама йис. Имомтыйн па щи сый тыйс. Нови тушпи ики ёх ким этсат, сыйл етшас. Па щи лэддан, йинщдаңан. Па щи сый сыйдмас. Хилдыел нох щи доймтас.

– Ма вантлэм сары, амуй?

Ким этас. Щикем арат ляль ёхатмал. Имомтыйн унт юха тыймел. Меңк ики ты этас.

– Хилдые! Кат ху ёнтты карты хар верламан!

– Наң верты нопсэн питас, наң щи верлан.

Ин от йи луйт элты карты хар верамтас.

– Ин ястал, – вуца вердам.

Наң, карты хар, тум шуца доя. Тыед вуца вера!

Ими Хилды ястал:

– Вуца вердан ки, наң щи вердан.

Карты харал тум ола дойс.

Тыед вуца верман щи йил. Щи йитал элты хилэлан лэпалмаса – карты юца щи пелас.

– Наң верэн щи, парас.

(Елды па ул)

Любовь Возелова нэпека лэщатам монц

Москва вошан рут ясаң элты потарсат

Мосванан Москва вошан худмет стратегической сессия «Информационные технологии и языки народов России» ус. Щита сот молтаскем хоят, арсыр вошат элты яха актацисат. Артан республикайт, вошат па куртат элты ёхтыдысат.

Кат хатл сус информационная технологияйт элты ясаң тусат. Ин там порайн кашң ун хоят, энамты няврэмат ивеван мутра ещадт омасдат. Муңев мосад уятты, хота па муй муң няврэмдүв мутра хуват вантлат па худантлат. Тухал айкедат ант рахал пуншты, вантты па луңатты. Ант рахты сайтат, ссылкайт мохты лап лопкадайт.

Там порайн хоят элты иса рахал интернет хуват уйтты, щита ураңан шеңк мосад номпсаңа па ошаңа улты. Кашң ты ёхтам хоят дүв лэщатам потрад тус. Ар айкед па потар рут ясаң элты ус. Рут ясаң ин анта туп нэпек хуват рахал уталтыты. Ин рахал па мосад искусственной интеллект пидан рупитты. Дүв хуватат потар ханшты, хор верты, тур сый нэпека ханшты, камн муй вер верты рахал.

Башкирия муван ошаң колонка ул. Хоят щита ошаң колонка пидан башкирской ясаңан потарты верытал. Ин там порайн муй туп антом: нави тут лап хуратты па нох вуцитты, ов лап пентты па пуншты, хотхар лёхитты мутрайт па па отат иса тур сый худантман рупитлат.

Кимет хатадан «Цифровые решения поддержки языков народов России: проекты образовательных организаций, студенческие инициативы в области компьютерной лингвистики» нэмпи лот лэщатман ус. Шеңк ям, хун энамты няврэмат ищи верытлат тамаш лотан айкед верты. Дүв рут ясаңда кеша



Хор: Любовь Возелова

ар платформайт, приложенияйт, сайтат вердат. Анта туп ун хоятат рут ясаң элты самдал хошидат.

Муң ин ивеван няврэмдүв, ун аңкилүв, ун ащилүв, аңкилүв-ащилүв пидан руц ясаңан потарлүв. Щита ураңан Любовь

Возелова щимац номас верас, мобильное приложение лэщатты. Варвара Сермер щита мобильной приложенияйн хорам хорат щуртас. Ямал муван ин ханты ясаң рахал мутра хуват уталтыты. Щимац ханты ясаң мобильное приложение ин ведщишак этас. Щеп мутра, планшет хуват рахал аңки-ащияснев худантты па луңатты.

Щита арсыр монщат, потар шупат, амаматщет улдат. Щита тумпийн мосад па рахал арсыр щиран ханты ясаң

пидан рупитты. Муң щита мобильной приложение елды па ялап айкедатан тэкаптадэв. Ар номас тайлүв, хоты па елды лэщатты. Муң утцилүв па хоятат вохты, хой дытал па верытал хор верты, ханты ясаңан ханшты. Там номер 8 908 863 8285 хуват потарта-ты, там почта хуват lvozelova@mail.ru айкед китаты.

Кашң ханты хоят, дүв рут ясаңда элты молты верытал верты. Муң ханты яснев юраң па тащаң. Туп муң яха юрэв понман, елды верытлүв аңки-ащиясаң худантты па луңатты.

Любовь Возелова ханшам потар



Хор: Любовь Возелова



Газета «ЛУХ АВТ»

Адрес редакции: 629003, ЯНАО, г.Салехард, мкр. Богдана Кнунянца, д. 1, каб. 106
+7 (34922) 4-68-63

E-mail: luh.avt@yamal-media.ru

Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708)

Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года
Регистрационный ПИ № ТУ72-00558

Тираж 1300 Заказ 165 тз
Подписные индексы: на год – ПА700, на полугодие – ПР561

№ 22 (1325)

Газета вышла в свет 30 мая 2026г.
Подписано в печать 28 мая 2026г.
по графику: 16.00
фактически: 16.00

Газета выходит по субботам

Цена годовой подписки 88 руб., в розницу не распространяется

Издатель

Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-Ненецкий автономный округ, г. Салехард, мкр. Богдана Кнунянца, д. 1, каб. 106

Фактический адрес: 629007, Ямало-Ненецкий автономный округ, г. Салехард, ул. Чубынина, д. 39А

Генеральный директор

АНО «Ямал-Медиа»
Зулинова
Марья Андреевна

Главный редактор

Яковлева
Аллина Кирилловна